

**Ն.Ս.Օ.Տ.Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ ՀՄԿՄԱՆ ԱՐԱՐՈՂՈՒԹՅԱՆ ԺԱՄԱՆԱԿ**
(22 ապրիլի, 2015 թ.)

Միրելի՛ եղբայրներ ի Քրիստոս,
Գերաշնորհ, հոգեշնորհ եւ արժանապատիվ Հայրեր,
Միրելի՛ բարեպաշտ հավատացյալներ,

Այսօր համախմբվել ենք Սուրբ Էջմիածնի Մայր Տաճարում՝ պաշտամունք մատուցելու մեր Տիրոջը, հսկման արարողության միջոցով հիշելու Հայոց ցեղասպանության ընթացքում նահատակված հայորդիներին: Մխիթարված ենք, որ այս պահին մեզ աղոթակից են այստեղ ներկա մեր Քույր եկեղեցիների պետերն ու ներկայացուցիչները, Էկումենիկ կազմակերպությունների ղեկավարները եւ պատվիրակները:

Տիրոջ կամքով վաղը՝ ապրիլի 23-ին, այս սուրբ տաճարի հովանու ներքո՝ հայոց առաջին քրիստոնյա արքայի՝ Սուրբ Տրդատի անունը կրող խորանի առջեւ, պիտի կատարենք սրբադասման արարողությունը Ցեղասպանության նահատակների՝ հայցելով սուրբ վկաների բարեխոսությունը ազգային ու հոգեւոր մեր կյանքի գորացման, առաջընթացի համար:

Նահատակության ոգին քրիստոնեական մեր կյանքի սնուցող աղբյուրն է, որ առատորեն ոռոգել է քրիստոսասեր ժողովուրդների հավատքի անդաստանները: Պատմության ընթացքում Եկեղեցուն կենսունակություն է պարգևել մարտիրոսների հեղած արյունը: Քրիստոնյա մեծագույն նահատակներից Սուրբ Իգնատիոս Անտիոքացի Հայրապետի խոսքով՝ «Ո՛հ կիզիչ հուրը, ո՛չ ջուրը չեն կարողացել մարել քրիստոնյաներիս սերն առ Աստված: Խիզախ ու արիասիրտ քրիստոնյաների համար մեծ բարիք է այս աշխարհում Աստծո հետ մայր մտնելը եւ Նրա հետ հաճնելը» (Ս. Իգնատիոսի վարքից):

Հայաստան աշխարհում եւս նորածիլ քրիստոնեական կյանքը սնուցվեց Քրիստոսի Սուրբ Ավետարանի լույսը տարածող մեր առաջին լուսավորիչներ Ս. Թադեոս եւ Ս. Բարդուղիմեոս առաքյալների, նորադարձ մարտիրոսների ու հավատի հերոսների արյամբ: Մեր ժողովուրդը պատմության ողջ ընթացքում հաճախ պատարագվեց նահատակության խորանի վրա՝ դառնալով աստվածապաշտության սքանչելի օրինակ: Ցեղասպանության տարիներին եւս մեր զավակների կրած նահատակության, չարչարանքի պատմությունները որքան ցավ ու տրտմություն են պատճառում, նույնքան եւ ավելի հավատքի մեջ ամրանալու, խիզախելու նոր խթան դառնում ամենքիս համար, ինչպես

պարագան էր առաջին դարերի քրիստոնյաների, որոնց համար, ըստ Պողոս առաքյալի խոսքի՝ «...կյանքը Քրիստոսն է, իսկ մեռնելը՝ շահ» (Փիլիպ. Ա. 21):

Նույն ոգին այսօր տեսնում ենք աշխարհի տարբեր կողմերում, մասնավորաբար Մերձավոր Արեւելքում, որտեղ քրիստոնյա հավատացյալներն իրենց կյանքով շարունակում են վկայել քրիստոսանվեր իրենց հավատքը: Մենք հիանում ենք այն քաջությամբ եւ տոկունությամբ, որ դրսևորում են մեր քրիստոնյա եղբայրները գրկանքների ու չարչարանքների մեջ: Նահատակության այս պատկերները միաժամանակ ընդգծում են անհրաժեշտությունը Քրիստոսի Սուրբ Եկեղեցու ջանքերի բազմապատկման՝ հանուն առավել ապահով ու անվտանգ աշխարհ կերտելու, քանզի մեր Տերը «խռովության Աստված չէ, այլ խաղաղության» (Ա. Կորնթ. ԺԴ. 33): Մեր ժողովուրդն ու Եկեղեցին ինչպես անցյալում, այնպես եւ այսօր մշտապես արտահայտել են իրենց նվիրվածությունը Քրիստոսի Սուրբ Ընտանիքի՝ Եկեղեցու այս սրբազան առաքելությանը:

Մեր մաղթանքն ու աղոթքն է, որ Հաղթանակած Եկեղեցուն միացած բոլոր նահատակները, նրանց հետ նաեւ Հայոց ցեղասպանության մարտիրոսները բարեխոս լինեն Տիրոջ առաջ աշխարհում խաղաղության եւ համերաշխության հաստատման համար: Մենք հավատում ենք, որ Ցեղասպանության նահատակներն այսօր եւս շարունակում են ապրել: Նրանց սխրանքն ու ոգեշնչող ներկայությունը մշտապես ուղեկից են եղել մեր ժողովրդին Ցեղասպանությանը հաջորդած բոլոր տարիներին:

Թող Աստված օրհնի արդարության եւ ազգերի միջեւ եղբայրության ճանապարհները, որ ոչ մի ժողովուրդ այլեւս չապրի ցեղասպանության ողբերգությունը: Աղոթք եւ օրհնություն Ցեղասպանության բոլոր անմեղ զոհերի հիշատակին:

Տիրոջ սերը եւ խաղաղությունը թող լինեն ամենքիս հետ՝ այժմ եւ միշտ եւ հավիտյանս հավիտենից. ամեն:

Աղյուսակի ճեղքով պահպանվող ժամի ժամանակահատվածի նմուշ





Հայոց ցեղասպանության սուրբ նահատակների սրբապատկերը